



BON DIA

Aruba



Frase di Dia

"Mayornan siña boso jiunan for di chikito con pa confrontá cosnan cu ta pasa pafó di cas"

Shon Realidad

Diasabra, 19 Februari, 2000

- 1 Florin-

Aña 8/No. 30349

Reina Infantil di Carnaval 2000: Edilienne Stenebome di Noord



ORANJESTAD—Ayerá nochí a tuma lugar eleccion di Reina Infantil di Carnaval 46 cu cai den nomber di e digno representante di Noord, Edilienne Stenebome.

Manera a wordo pronosticá, un evento masha bunita a tuma lugar den Elias Mansur Ballpark, caminda cada un di e nueve popchinan a duna lo mihó di nan p'asina logro conquistá e corona di e Promé Reina Infantil di Siglo XXI. T'asina cu Edilienne Stenebome di Noord a bai cu e 25 titulonon di Reina Infantil di Aruba su Carnaval.

Como promé finalista a wordo eligi Lyxienne Bareño di Dream Kids; 2do finalista Kylie Lianne Figaroa di Kids of Fame; 3era finalista Nabila Lourens di San Nicolas y como 4to finalista a wordo eligi, Richamalah Santana di Kids & Teens. Un pabien pa tur e participantenan y specialmente pa e candidata infantil di Noord, Edilienne Stenebome, Reina Infantil di Carnaval 46.

Chofer lo a dal peaton intencionalmente



DAKOTA - Den careda di 9.30 ayera nochí Polis a wordo mandá cu urgencia den Maracastraat, banda di e casnan di pueblo na Dakota, unda cu lo tin un accidente cu herido.

Na yegada e patruya a bin constatá cu un peaton a wordo alcanzá pa un pick-up, manehá pa e cabayero di faam Maduro.

Loke cu por a comprendé na e sitio ta cu e pick-up a dal e señora y dor di e impacto esaki a bai haltu y cai riba e hood. E chofer lo a sigui corre y despues di mas o menos 40 méter a brake y e peaton a cai bek riba caminda dilanti auto.

Tin testigo a bisa cu na e momentonan ey ainda e chofer kier a sigui corre, pero personanan den vecindario a evitá esaki y cu e ta pasa riba dje. Na unda e auto a para, ta net na final di un carretera asfaltá.

E señora a ricibi masha hopi sla na su cabez, schouder y garganta. Na momento cu e tabata wordo transportá pa Poli, ta ser bisá cu e tabata saca sanger, probablemente dor di sla interno. E chofer a wordo detené na e sitio pa pasa test, pero despues a ser mencioná cu ta investigando e hecho cu e lo a dal e señora intencionalmente.

Riba e combinacion di foto por mira momento cu Polisnan ta papiando cu e chofer y ora cu e tabata sintá den su vehículo ainda.



**10 mula
condená pa
transporte di
525 bolita y un
total di 7 kilo di
cocaína** *Pagina 3*